

四庫全書

史部

欽定四庫全書

史部

欽定南巡盛典卷八十一之三

詳校官通政司經歷臣郭祚熾

欽定四庫全書

欽定南巡盛典卷八十一

名勝

臣等謹案方域之內山為積德川為積形而扶輿  
清淑磅礴之氣又必獨鍾靈秀以表異於山水之  
間頌為輿區目為福地圖繪景物美諸形容此亦  
嶽貢川珍之一驗也禹貢冀兗徐揚之域都會星  
羅於山見泰岱之高於水見黃河之深帶以長江

清淮達於具區漸水其間巖谷森秀花木清妍據  
四達之衝而復擅登覽之美者所在多有豈獨如  
歐陽修所舉金陵錢塘為東南勝境歟然以  
擬

聖天子勤民育物之本懷則不在是溯自  
鑾輿未駕即以率由舊章毋或踵事增華  
諄諄垂誠迨夫

入疆伊始劇易周知時未經旬庶政備舉即偶值

幾暇登臨亦無非

軫念民依形諸

歌詠蓋

帝心所繇注者惟河工海塘之永慶安瀾而不在問水

尋山之足供

睿覽所欣慰者惟農夫蠶婦之咸安耕織而不在尋幽

選勝之偶愜

宸襟是以

德澤涵濡山川增潤一卉一木莫不共効珍異同副

昌期斯誠極千載一時之嘉會矣矧夫

駐蹕之所於以敷政觀侯復屢奉

訓言務從簡樸大河以北安設帷宮僅列桎杻間備屋

宇礮斲不施自揚州江寧而至蘇杭則多就名藍

左近畧為構葺敬奉

宸遊居頌有那

壽同無量至是而知朝會之地與名勝之區胥沐

光榮要非初建臣等所由彙載一編而無所容其侈叙  
者也謹志名勝第十一





欽定四庫全書

欽定南巡盛典卷八十一

名勝

乾隆十五年十一月初五日

上諭內閣曰朕明歲巡幸江南隨駕人員已經派定左侍郎秦  
蕙田自行奏請以臨幸惠山必至秦園為辭秦園在惠山之麓  
聖祖嘗經臨駐

留賜御書朕清蹕所經自當瞻仰然不過名山古蹟偶爾

登臨初非因朝臣林園之勝足供遊覽致煩供帳秦  
蕙田已不准隨駕並令軍機大臣等諭知朕意但恐  
秦蕙田指稱臨幸派累闔族人衆出資脩理而伊獨  
居其功且以餘資自潤此則不可著傳諭黃廷桂令  
其留心查察至園亭既有

皇祖御筆即動用商捐公項官為脩理俾得世世承守豈  
不更沾愷惠乎

乾隆二十年六月十九日

上命軍機大臣傳諭兩江總督尹繼善曰朕明歲南巡  
一應務從簡樸之處已屢降旨曉諭該督等矣茲據  
尹繼善奏稱從前未及登臨之地如寒山別墅石湖  
石佛寺棲霞山等處一併酌量興修以備省覽等語  
此等處所皆與行宮相去不遠間或登臨眺覽俱可  
即日往返無庸駐蹕只當就山寺內原有屋宇可以  
憩坐之處量為掃除不可尚構行軒以滋糜費其修  
葺費用一併于普福所奏商捐銀內動支

乾隆二十七年三月初九日

上諭內閣曰朕奉

皇太后安輿蒞茲南服所以省方觀民勤求治理其各處  
舊有行宮清蹕所駐為期不過數日但須掃除潔淨  
以供憩宿足矣固無取乎靡麗飾觀也而名山勝蹟  
尤以存其舊規為自然之趣從前屢降諭旨至為明  
晰乃今自渡淮而南凡所經過悉多重加修建意存  
競勝即如浙江之龍井山水自佳又何必更興土木

雖成事不說而似此踵事增華伊於胡底轉非朕稽  
古時巡本意且河工海塘為東南民生攸繫朕屢懷  
宵旰時切紆籌地方大吏果能加意修防永資捍禦  
則茲之親臨閱視其欣慰當何如耶而田疇豐潤井  
里熙恬所以博朕愜覽不在彼而在此也嗣後每屆  
巡幸之年江浙各處行宮名勝處所均無庸再事增  
葺徒滋糜費即巧慢裱飾至年久剝落亦可悉任其  
舊此寔為愛惜物力起見也該督撫等其各善體朕

諭敬相遵守

乾隆二十九年十月二十日

上諭內閣曰崔應階前奏該省魏家莊大營有四賢祠  
陳家莊有晏子祠其建祠時代始末及諸賢姓氏事  
蹟並費縣之萬松山有無故實可稽俱著確切查明  
詳悉具奏

乾隆四十五年正月十九日

上諭內閣曰朕因東南黎庶望幸情殷爰舉舊章五巡

江浙所以省方觀民勤求治理清澤所經各處舊有  
行宮祇令掃除潔淨以供憩宿毋得踵事增華致滋  
糜費屢經降旨諄切曉諭封疆大臣自能仰體朕心  
遵旨辦理第念直省行館近京數程屢經駐蹕即坊  
壇裱飾為費尚屬無多其自山東以至江浙所有行  
宮則自乙酉南巡至今未經臨莅閱時既久不免虧  
舊剝落地方官修理葺治不無所費且山東江蘇二  
省俱有添建座落此項用度聞各省俱係捐廉辦理

在地方大吏養廉豐厚分年扣捐以抒忱悃尚屬可行況朕又復加恩賞給庫銀用示體恤伊等辦理儘足敷用若更因此派累閭閻致滋苛擾則斷不可且非朕念切民依行慶施惠之意也第恐不肖有司或有藉辦差為名暗中科歛而窮鄉僻壤未及周知亦有幫貼差費者一經察出必將該督撫等重治其罪以昭警戒其各遵凜朕旨慎勿自干嚴譴也

乾隆四十七年十二月二十七日



上諭內閣曰浙省上屆辦理南巡於杭州西湖等處添設座落點綴甚多繁費無益殊非朕省方問俗之意屢經降旨訓飭而此內葛嶺一處鑿山開道建蓋屋宇尤屬無謂且所費不貲朕心寔所不取是以上屆即未往臨幸此皆王亶望王燧借辦差為名肆行糜費外博見長之巧陰遂貪縱之私其罪寔由於此著傳諭福崧於葛嶺座落斷不必再加脩整但係已成之局竟任其自然可也

乾隆四十九年五月初一日

上諭內閣曰仿宋板五經著於直隸趙北口絳河山東  
德州白鶴泉泮池泉林江南天寧寺高旻寺金山焦  
山寄暢園蘇州靈巖山江寧徐州柳泉浙江杭州聖  
因寺龍井安瀾園等處各陳設一部其平定準噶爾  
回部兩金川得勝圖亦著一併陳設

欽定南巡盛典卷八十一

欽定四庫全書

欽定南巡盛典卷八十二

名勝

乾隆十四年七月十五日大學士公傳恒等奏言臣等遵  
旨會同浙江巡撫臣永貴議得

聖駕南巡浙省所有杭州織造衙門

行宮舊在衙署東西兩旁其西首殿內供奉

聖祖仁皇帝神牌伏思

神牌在織造署前已屬未協而臣子署中供奉

神牌尤非敬謹之意今議將織造移駐於裁存鹽政衙署  
就現存宮殿房屋量加修葺於

宮後建樓供奉

神牌將來

皇上駐蹕亦便行禮其中房屋或年久傾圮或規模卑  
小並地方卑濕木料不無剝蝕俱應量為添換購  
辦至城外西湖地方

行宮經前撫臣李衛奏明改作佛寺

世宗憲皇帝御題名曰聖因舊制房屋四所地盤甚寬現亦供奉

聖祖神牌但在西偏甚非體制應請敬謹移供從前舊

寢宮其西首房屋並迤西一帶地基及寺後山圍酌量劃

出另建

行宮就現在房屋並可用木料量為增添購辦以上  
行宮二處其舊有宮殿房屋及臣等現在商酌派改

之處謹繪圖呈

覽俟

欽定後令該督撫等敬謹遵照從儉辦理至于海塘自  
翁家埠至尖山離城一百五十里由杭城前往止  
有塘路一條塘外皆係漲沙窪地塘內皆係村舍  
桑園難以相度

駐蹕之處中小疊更在禪機河莊兩山之間北岸既沙  
嫩泥渾南岸道路亦窄狹紆曲查海塘引河從前

康熙年間

聖祖均未巡幸現今江海安瀾隄工鞏固引河水歸故道

此次

皇上南巡臣等愚見似毋庸

親臨閱視惟查候潮門外舊有觀海樓一座從前

聖祖南巡曾經

臨幸該處既可觀潮而中小壘引河等處亦可遠眺應畧

為修飾以備

臨幸至于杭城內外及紹興嘉興等處名山勝蹟可備  
巡覽之處均有房屋無庸添建是以臣等未及另行定

議凡

聖駕臨觀憩息處所俱就現在房屋內酌量粘補修理  
數間不必拘泥現在圖樣亦無事過於華飾至紹  
興府之南鎮蘭亭二處與

禹陵相去不遠從前

聖祖未經臨幸該處現在亦俱有房屋並應畧為修理俟



皇上幸浙之時應否

臨觀恭候

欽定謹各繪圖粘簽並經由水陸程途一併進呈

御覽至一切沿途經行道路橋梁作何修理預備之處

臣永貴回任後會同總督並嚮導大臣等會商妥議再行具奏請

旨奏入報

聞

乾隆十五年正月初四日大學士公傳恒奏言臣等遵

旨會同臣黃廷桂等議得辛未歲

聖駕南巡自德州由山東東路至江南宿遷縣登舟已  
經奉

旨允行其自楊家莊渡黃駐蹕直隸廠營盤原擬於此  
處添設

行宮今臣等公同酌議此處可以無庸建造仍

駐蹕營盤

皇上自直隸廠起旱閱視河工至高家堰

行宮駐蹕仍由旱路回駐直隸廠營盤自直隸廠登  
舟由天妃閘越河過清江浦達淮安其淮安城內  
總漕衙門內之

行宮並總漕衙門年久朽壞難以

臨駐已奉

旨毋庸修理

皇上仍駐

御舟由運河直達揚州三汊河

行宮駐蹕自三汊河至天寧寺復登舟至平山堂仍

由原路回駐三汊河

行宮自三汊河登舟至瓜洲渡江金山寺

行宮駐蹕由金山至焦山象山由象山旱路至甘露

寺並至教場閱操畢回駐金山閱視水操過江至

錢家港登旱路至龍潭

行宮駐蹕由龍潭至江寧省

行宮駐蹕俟覽閱名勝後仍由原路回至龍潭由龍潭至寶華山回駐龍潭仍至錢家港登舟進鎮江口直達無錫惠山至秦園回舟行抵蘓州

行宮駐蹕由旱路至虎邱仍由原路回駐蘓州行宮又由旱路至靈巖山

行宮駐蹕由靈巖至鄧尉山此處前擬添設

行宮今酌議不必添建或俟此次

巡幸後將來漸次酌辦由鄧尉山至靈巖仍還駐蘓州  
行宮復由旱路往觀音山等處亦回蘓州

行宮駐蹕其蘓州至松江往返八九日道路綿長沿  
途並無名勝古蹟可備遊覽所有舊時

行宮均已朽壞業經奉

旨毋庸巡幸自蘓登舟至平望即入浙江地界臣等謹  
按圖會商其應行新添及可不必添建並舊有而  
無庸修理之處俱仰體

皇上從儉辦理之意詳悲講明定議並於圖樣內分別貼簽進呈至高家堰舊有

行宮尚堪修理應估修費就近會同河臣監修江寧蘓州舊有

行宮均在織造衙門之內尚多完整應照舊式修理粘補亦估定修費會同江寧蘓州兩織造分修其餘應修

行宮俱照呈樣酌減修理合併奏明奏入報

聞

乾隆二十年五月二十三日署兩江總督尹繼善  
兩淮鹽政普福奏言竊照江南臣庶仰望

鑒輅重臨莫不情深踴躍臣等業已聯名恭奏請定吉  
期

南巡凡屬差務均已酌定章程次第預備各處  
行宮及名勝之地仰遵

聖訓撙節妥辦不敢稍事虛糜經臣尹繼善節次奏明



茲臣尹繼善查勘各處應修工程臣普福在鎮江  
相會將一應事宜又復面為商酌分別緩急妥協  
料理所需經費荷蒙

恩旨於運庫應解內府閑款銀兩撥給十數萬兩茲臣  
等公同商酌查有應解內府生息餘利銀十二萬  
九百六十兩零又吉安窩利銀五萬二千三百二  
十九兩零以上共銀十七萬三千二百八十九兩  
零一切備辦事宜均請於此內動用統俟事竣另

開清摺奏報所有遵

旨撥動運庫閑款銀兩臣等謹合詞恭摺具

奏奏入報

聞

乾隆二十年六月二十日大學士公傅恒等奏言

尹繼善等奏請

南巡另摺稱

聖駕未經臨幸之處如寒山別墅石湖石佛寺棲霞山

等處均應畧加修治以備

省覽所需費用奉

旨令臣等籌項臣等恭查

南巡經費先經遵

旨傳諭普福於兩淮運庫應解閑款內撥給十數萬兩  
交與該督為動用之需嗣據普福奏將生息餘利  
及吉安窩利二項共銀十七萬三千餘兩撥用今  
臣等酌議如普福奏撥數目不敷應統令於應解

開款內再為撥給數萬兩一併交與該督為辦理  
費用奏入報

聞

乾隆二十年九月二十五日兩江總督尹繼善兩  
淮鹽政普福奏言竊臣前奏寒山別墅石湖石佛  
寺棲霞山等處從前

聖駕未經臨幸之所均酌量興修以備

省覽欽奉

上諭新預備之處可畫圖呈覽並將所需費用復命大學士等籌議於運庫應解開款內再為撥給銀數萬兩

恩施稠疊感激難名除應繪各圖臣現在親行賁呈御覽並將此外續修名勝另行詳細奏

聞外伏思此次差務臣惟事事仰遵

聖訓加意妥辦所有寒山別墅等處原係畧加修葺以備

登臨茲蒙

聖主隆恩續撥銀數萬兩以為辦理費用臣與鹽臣普福商酌查有應解內府生息一項自本年七月起扣至明歲六月底止應交息銀七萬二千兩請即於此內酌留銀六萬兩應用事竣連前撥運庫銀兩一併開具清摺奏報臣謹會同兩淮鹽臣普福

合詞恭

奏奏入報

聞

乾隆二十二年五月初三日兩江總督尹繼善奏

言恭照

皇上軫念徐屬屢被偏災

親臨閱看

恩施稠疊至渥至周凡河工應辦工程無不詳悉

指示復念河流順軌全憑

神功默佑

命臣擇地建

龍神廟并酌量修建房屋以為勘工

駐蹕之所臣謹遵

諭旨於恭送

聖駕後回至徐州親行查勘彭城地處窪下高燥平坦之區甚少北門外雖舊有

大王廟但地勢窄狹兩旁俱係民房

城外週迴查閱西門以外地勢雖寬一遇陰雨即



有積水惟雲龍山旁有隙地十餘丈可以建廟形勢北向俯視黃河規模其屬宏敞且雲龍山名亦與

龍神廟字義相關極為合式西北有地數十丈高爽平坦可建

行宮其地在郡城之南雲龍山之北遠近適中臣相度再四此處最為妥協謹將勘定地基繪圖敬呈  
睿覽伏惟

聖明訓示以便委員確估另行奏

聞卽遵

旨動運庫公項辦理務期仰體

聖心諸從儉約奏入

上諭曰不必另擇地此不過在廟旁就便一宿之地可  
耳何須多費廟牆週圍寬展足容數間憩息一宿為  
妙

乾隆二十二年十二月二十三日兩江總督尹繼

善奏言竊臣接准

廷寄欽奉

上諭前因徐州孫家集河溜直趨汕刷深濬降旨令該  
地方建立河神廟以答靈貺嗣據尹繼善奏擇地雲  
龍山西北並建行宮繪圖進呈經朕批示不必另擇  
地基祇須於廟旁構闢數間可容一宿憩息足矣並  
將圖中圈出寄諭令其遵照辦理乃距今日久所辦  
若何未經奏到此等處不過數年一至信宿言旋何

必多費以飾美觀該督勿因前已估計興工遂謂成  
事不說非所以體朕意也著傳諭尹繼善務遵前旨  
將現在所辦情形即行具奏再石隄工程前據該督  
奏稱於霜降後動工此時水落歸槽諒已興工何時  
可以完竣著一併奏聞欽此除徐城石工完竣日期  
業經臣等會摺奏

聞外伏查孫家集大工告成河流順軌前奉

諭旨建立

河神廟並酌建房屋以為勘工

駐蹕之所經臣擇地雲龍山之北繪圖進

呈荷蒙

皇上明切指示不必另擇地基只須於廟旁構建臣仰

體

聖心諸從儉約辦理隨即親行相度即於廟基之旁擬

建

行宮三層從房亦不多蓋止期樸實不事華美約計

費用不過八九千兩於廟工辦完之後即行續辦  
今廟工已於十一月十九日如式完竣應建

行宮業已委員購備物料次第興工明春即可告成  
並不敢徒飾美觀稍有糜費所有現在辦理情形  
臣謹繕摺具奏並將房屋基址繪圖恭呈

御覽仰祈

聖明訓示再廟工告竣應請

河神封號並匾額碑文告祭等事宜另照例具題合

並陳明奏入報

聞

乾隆二十九年十一月初四日山東巡撫崔應階

奏言竊臣承准

廷寄乾隆二十九年十月二十日奉

上諭崔應階前奏該省魏家莊大營有四賢祠陳家莊  
有晏子祠其建祠時代始末及諸賢姓氏事蹟並費  
縣之萬松山有無故實可稽着即確查詳悉具奏欽

此臣謹按四賢祠在泰安境內山東通志內載泰山西南麓有投書澗上書堂係宋儒胡瑗孫復石介講學之地舊有祠宇今祠已廢後人於縣境東南鄉建祠祀胡瑗孫復石介又增祀孔道輔為四賢祠其建祠時代無碑記可考又謹按晏子祠在齊河禹城交界之處山東通志內載齊河西北二十五里有晏城係齊相晏嬰采邑後人立祠於晏城之北祀齊相晏嬰其建祠時代亦無碑記可考



又謹按萬松山在蒙山之南通志內載費縣北七  
十里有蒙山山趾延亘一百三十里其前為陽口  
山有玉皇觀老子故宮又費縣志載陽口山近祊  
城山之北浚水出焉今萬松山即陽口山其上多  
松故土人咸呼為萬松山臣謹遵

旨查明覆奏入報

聞

乾隆四十五年二月二十二日閩浙總督三寶浙

江巡撫王亶望奏言竊臣三寶前在浙江巡撫任  
內於乾隆四十年因開濬西湖告成勒碑紀事相  
度樹碑之所獲隙地於六一泉左相傳係孤山柏  
堂竹閣舊址恭讀

御製詩集乾隆二十七年三十年兩次

南巡俱有柏堂竹閣

宸詠臣敬考

詩中所指印之杭人相傳柏堂竹閣遺址確係其地仰

見

聖學淵深即一地一名舊跡所在無不援据詳核臣以  
其地為白居易蘓軾遺跡且蒙

天章題詠當即畧為修復還其舊名作記述事又臣三  
寶曾夢

御題羅漢大士像臨流示現隨因謝兩詣上天竺於大  
士殿之西獲有靈泉宛符夢兆因即其處構殿供  
像臣亦有記述今恭逢

皇上五舉

南巡盛典臣等現於該二處重加修葺恭備

座落祇候

宸章奏入報

聞

乾隆四十五年三月二十三日兩江總督薩載江

蘇巡撫楊魁奏言竊臣薩載於上年查勘棲霞工

程行至千佛嶺以東見石壁所刻隸書白乳泉試

茶亭六字臣等考之江寧府志攝山中峯上天開  
巖為明徵君故宅宅後有白乳泉又檢閱明人盛  
時泰攝山志白乳泉在棲霞寺千佛嶺下昔有伐  
木見石壁上刻隸書六字曰白乳泉試茶亭不知  
得名所自又考唐人皇甫冉有送陸鴻漸棲霞寺  
採茶詩黃居中有試茶亭詩復閱盛時泰金陵泉  
品有白乳泉讚是白乳泉之名由來已久今於其  
地敬構數椽恭懇

聖駕臨幸棲霞時順道片時憩息俾前人陳跡得邀  
睿覽山澤生輝榮幸無極臣等謹繕摺具

奏並將皇甫冉黃居中盛時泰詩讀各一首另繕恭

呈

御覽奏入報

聞

欽定南巡盛典卷八十二

欽定四庫全書

欽定南巡盛典卷八十三

名勝

直隸山東

盧溝橋在廣寧門西南三十里盧溝即永定河發源代郡古桑乾水也石橋橫跨二百餘步狃於金明昌間名曰廣利康熙八年重建

聖祖仁皇帝製文紀石南有河神廟沙平坡轉古樹蒼然東為拱極城百雉崇墉環若雲幄橋當往來孔道

輪蹄絡繹每曉星初霽素月暖空西山諸峯羅列  
如畫乾隆辛未歲

御書廬溝曉月並

賜以詩敬勒碑於亭以誌勝景云

郊勞臺在良鄉縣南乾隆己卯歲耆定準夷蕩平  
回部闢疆二萬餘里露頂奮肘候月歸琛者以億  
萬計庚辰三月將軍兆惠等振旅凱旋築臺建大  
纛七先期



皇上駐蹕黃新莊

行宮於是日設鹵簿陳饒吹

親勞郊外行抱膝禮以

示褒異諸將士次第

慶賞舍爵策勲禮成

御製詩章紀事丙申四月將軍阿桂等平定兩金川再  
舉

郊勞盛典如前儀

駿業

鴻庥昭茲來許梯航所會瞻仰靡極

宏恩寺在良鄉縣南門臨古道繚以周垣環以叢  
木蒼翠陰森為遊人憩息之所六時清梵一杵疎  
鐘響出林表初不知在輪轅雜還間也

聖祖仁皇帝翠華三幸

賜書大願慈航額並

題詩勒石

皇上時巡道經斯寺

天葩煥采普蔭曇華洵郊坰之福地云乾隆辛未

御書額曰秀挹龍泉

永濟橋在涿州城北跨巨馬河瓶於前明因河流

南徙橋失其用乾隆庚辰歲

勅建新橋而改舊橋為涵洞十有八平其脊以連新橋

迤北之尾通長二百丈有奇橋南表以坊字輔以

樓欄西曰攬翠東曰延清地列望緊為九達輻輳

之會自此民無病涉車無留軌衆流歆歆沃衍

神臯榆柳垂陂蒲葦夾岸橋闌轉處西連高阜建亭

其上奉

御製碑文與盧溝橋

御碑亭輝映百里為

畿南雄構焉

涿州古涿鹿之地黃帝所都也魏土地記下洛城

東南六十里有涿鹿城城東一里有阪泉泉上有

黃帝祠今州城南廟祀黃帝為藥王猶髣髴其遺  
蹟皓壁瑯輝丹楹欽葩四圍濃翠影罨繚垣乾隆  
辛未年恭葺

行宮於左平岡迤邐環若屏嶂石徑紆折亭館周通  
飛閣構其旁憑高遐矚控山襟河縈

畿帶甸雲連萬室塔影浮空信為雄輔形勝之最丁  
丑

御書額曰秀野迎薰曰黃圖攬勝曰觀風自近聯曰雨

暘時若天庥應風日恬和物象舒又聯曰梵響清  
巖天籟轉香燈華曜月輪明又聯曰山容積雪融  
和盎物象熙春詠蕩披壬午

御書聯曰春色芳菲入圖畫化機活潑悟魚鳶乙酉  
御書聯曰勒寒花樹芳遲發向暖郊原潤建耕

紫泉在新城縣西考水經注巨馬水上承督亢溝  
於迺縣東東南流厯紫淵東今按方位紫泉即紫  
淵其名舊矣源出龍堂邨逕釣魚臺繞郭而西厥

有與區碧流環帶如練乾隆辛未歲建

行陞於中畫舫風亭清幽颯爽埭旁植修竹拳石秀

峙畧約紆迴

畿南名勝首屈一指焉辛未

御書題十景額曰敞軒屏山鏡湖舫室樓亭虹橋魚罾

石逕竹埭箭廳壬午

御書額曰景湛清華曰雲川飛泳聯曰澗筑松濤相問  
答峯容波態總氤氲又聯曰石泉不改琤琮主雲

噉常看圖畫橫又聯曰圖畫奇參窗戶裏  
疏琴響  
遞榻床邊又聯曰法輪自轉光明藏  
龍象經行兜率天又聯曰松陰真是蓋  
鶴跡自成書

趙北口在任邱縣北五十里即趙堡口後漢書公  
孫瓚傳所稱燕南垂趙北際也亘以萬柳堤橋十  
有一虹跨其上為南北通衢西淀諸水由此東注

聖祖仁皇帝舉水園之典葺治

行殿並於端村郭里口圈頭各建一所



皇上式繩

祖武每當春省之期輒

命水虞修故事焉

時巡南國屢

駐青旂水榭風廊映帶左右晴空一碧

寫詠鳶魚彷彿江南圖畫也乾隆辛未

御書軒額曰湛持曰天水相與永又齋額曰渌淨又樓

額曰懷清又聯曰香閣結雲瞻寶相花臺飛雨現

金仙

韓太傅祠在任邱縣南十里四善村村即漢韓嬰故居也嬰於孝文時為博士景帝時為常山王太傅推詩人之意作內外傳數萬言與齊魯二家並稱燕趙言詩者多宗之兼著易傳惟韓氏自傳其學有授經臺在祠之後曲徑窈窕卉木環蔭塍畦綺錯含秀鋪築乾隆壬午歲仍舊宇脩葺為行宮牆垣簡樸欄檻清曠與遠坳雲樹相映帶

皇上卽景懷古易村名曰思賢並

御書額曰賢里諏風又堂額曰授經聯曰麗日和風春  
浩蕩花香鳥語物昭蘇又聯曰縈迴水抱中和氣  
平遠山如蘊藉人又聯曰纔聞善事心先喜每見  
奇書手自抄又聯曰書圃禮園無數好甌香研淨  
有餘欣又聯曰庭饒芳毯鋪生意座有芸編結古  
歡又聯曰香凝貝葉莊嚴具寶湧蓮花福德多

毛公祠在河間縣南太平莊後漢書儒林傳毛萇

武帝時為河間獻王博士治詩別於齊魯韓三家  
授同國貫長卿平帝時立於學祠為元總管王思  
誠建堂階樸素叢木蒼鬱清流襟其北苔垣竹牖  
倒影玻璃乾隆壬午歲恭構

行館於左繕葺規模不事雕文藻績軒窓瀟灑  
天筆揚葩風雅流傳於茲勿替矣壬午

御書額曰陳詩展義聯曰澄懷茹古涵今處悅志來疇  
黍隴間又聯曰問字惟應知稼穡著書何必注蟲

魚又聯曰生機對物觀其妙義府因心護所寧又  
聯曰雲現吉祥垂妙鬘花增智慧湧優曇乙酉

御書聯曰獨喜惜陰澄靜照更因稽古契遐心又聯曰  
無邊生意歸芳甸有象清明繪野郊庚子

御書聯曰縱目恰宜遇寥朗託懷又喜得清舒

紅杏園在獻縣南三十里河間獻王曰華宮故址  
也獻王好儒術置客館二十餘區一時文學士多  
從之遊明為御史王注別墅環植紅杏數百株故

名有亭翼然有池泓然月橋形似半規曲通臺榭  
乾隆辛未歲仍舊制葺為

行館駢柯晦葉萬萼絢春縐縠漣漪菰蘆一碧禽魚  
翔泳多會於欄檻之前爰愜

宸襟邀

睿藻焉辛未

御書額曰綠淨又聯曰却喜名園傳翰墨亦饒幽趣足  
徜徉壬午

御書聯曰萬頃綠雲秋麥蔚千村紅雨杏花深甲辰  
御書聯曰平野潤含雪後澤遠峯輕作晚來陰

絳河自故城流入又北逕景州西水經注絳瀆西  
至信都東連廣川縣之張甲故瀆同歸於海故漢  
書地理志禹貢絳水在信都按故城漢廣州治景  
州屬信都國河即絳瀆之遺也斜抱村墟環罨烟  
樹中構

行館為

駐蹕之所乾隆乙酉

御書額曰展義齋曰

願志堂曰通淥橋曰澹懷室曰延月臺曰涵虛舫曰葆光

洞曰四照亭聯曰康衢敷惠澤喜洽畿南樸宇通  
邨居塵清水北又聯曰土香階草纔蘇紐風細盆  
梅欲放榮又聯曰半窓愛日虛而朗一水護門湛  
且清

開福寺在景州治西北前明舊刹也層檐疊架博



敞豐麗傑閣峙其旁名曰千佛前有古塔相傳隋  
時建累十有三級覆以鐵籠銅瓶環以瑜欄石砌  
盤回陡絕洞戶豁然四圍周眺蓀城萬雉闌闔村  
墟梯比鱗次康熙丙戌歲

聖祖仁皇帝嘗

駐蹕焉

皇上經臨疊敷

宸藻慧日祥雲永麗於蘭若間矣

恩泉在德州南門外川原曠衍林木叢茂撫臣就  
其地恭建

行宮

皇上南巡入東省第一程也乾隆丁丑而後屢邀

駐蹕疊煥

宸章禹氏遺封遂為勝地矣壬午

御書額曰海岱觀風曰念民依聯曰泉香馥郁凝華蓋  
多寶莊嚴護梵文又聯曰德水縈迴涵化澤康衢

詠蕩聽謹謠庚子

御書聯曰碧窗試褰幌綠野遍興鋤

曲陸店在平原縣西北三十里乾隆丙申歲

皇上時巡東岳撫臣恭建

行宮以駐

清蹕嗣後

翠華南幸

睿藻屢頒從此趙勝故封管輅舊里常輝映千古矣庚

子

御書額曰靄綠曰閱芳聯曰四壁圖書鑑今古一庭花  
木驗農桑

李六店在平原縣東南十五里與平原嶺相近舊  
治平原有望遠臺一名平原嶺登高平眺百餘里  
如在几席乾隆辛卯歲撫臣構

行殿數楹仰邀

天藻額其堂曰醇和蓋飲和食德返樸還醇具於

聖主省方驗之矣庚子

御書聯曰麗日和風春澹蕩花香鳥語物昭蘇又聯曰  
遍野麥針含露潤夾衢柳線冒烟輕又聯曰無邊  
生意歸芳甸有象清明繪野郊又聯曰心田洗淨  
全如水鼻觀清芬詎必蓮又聯曰得句因新意觥  
書是宿緣

晏子祠在齊河縣西北二十五里地名晏城為齊  
晏嬰采邑太平寰宇記禹城縣有晏嬰城即此也

乾隆乙酉歲撫臣於祠之西恭構

行宮瓦屋數楹不假雕飾乾隆庚子

御書聯曰軒亭喜淳樸甌研總清嘉又聯曰居中攬外  
襟懷暢擊轂摩肩職殖殷又聯曰麗日和風方蕩  
漾輕莢嫩草已芊眠

潘村在長清縣東北旁有朶子諸山巖壑參差樹  
林蒨葭與綺縠繡壤相交錯乾隆辛卯歲撫臣恭  
建

行館數椽亭榭清幽

翠蓋頻臨

宸襟遠望自此以南靈巖泰岱迤邐相屬為東省鉅觀

庚子

御書聯曰墨斗研山足道興琪花瑤草底須妍又聯曰  
舉目峰巒遙望甄心翰墨挹清芬甲辰

御書聯曰勒寒花樹芳遲發向暖郊原潤逮耕又聯曰  
春隴詩成滿幽野雲巖畫意妙房山

苗山在長清縣東南三十里山容秀削翠柏盈巔  
望如螺髻乾隆三十六年恭建亭館數楹以供

宸眺青崖五峯諸山勢若環拱

靈巖山在長清縣東南九十里一名方山于欽齊  
乘云即水經所謂玉符山也上有黃龍甘露獨孤  
雙鶴卓錫石龜六泉下為靈巖寺寺內有山石色  
黑繡如鐵覆地如架裝披摺之狀土人謂之鐵架  
張山相傳為希有佛出現之所寺建於元魏至唐



復移於山下峰壑秀美謁岱嶽者必紆徑以造焉  
乾隆丙子歲撫臣於寺之舊址恭建

行殿采椽不斲尚存茅茨土階之風而山色溪光足  
供

宸玩十道圖以靈巖與閨之棲霞台之國清荆之玉泉  
稱為四絕宜其屢邀

睿藻雲漢同昭矣丁丑

御書額曰卓錫名藍又書愛山樓額曰巡方攬秀又書

各景額曰巢鶴巖雨花巖甘露泉卓錫泉白雲洞  
鐵袈裟摩頂松聯曰奇松爾日猶回向詭石何心  
忽點頭庚子

御書聯曰巖壑有奇趣烟雲無盡藏又聯曰卧檻寫霧  
軒窗迥飛觀圖雲翰墨香又聯曰翠含螺黛山迎  
戶影覆曾青樹隱天又聯曰入幽已自清塵念造  
極還堪縱遠眸又聯曰俯臨常似披圖畫得契宛  
堪悅性靈甲辰

御書聯曰便有香風吹左右似聞了義示緣因

泰嶽在泰安縣北周圍一百六十餘里從麓至頂  
四十八里凡十八盤而上中峰最高處為岱頂世  
所稱玉皇頂也其支峯別阜為峯為嶺為巖為厓  
為洞為峪凡百餘名而南天門十八盤山勢尤峻  
非架木為橋不能高陟乾隆二十二年欽奉

上諭登山路逕或乘馬或用山輿即緩步徐行亦何不  
可不必搭架天橋致多糜費故厯次

車駕登岱皆策騎而上絕無修繕之煩若紅門玉皇廟  
朝陽洞及岱頂諸名勝之尤著者經撫臣恭建

行軒數楹謹各綴說於後

紅門循山麓而上徑路逶迤至是則山勢若翼闢  
塗而升蓋登岱之初級也紅門之西恭葺數楹以  
備

宸遊憩息

玉皇廟在迴馬嶺稍南峻閣聳峙俯瞰萬象乾隆

十三年

御題曰壺天閣西有倚山亭閣東建屋數楹以供

宸眺

朝陽洞由三蹬厓盤路峻削至五松樹則地平如  
掌曲徑縈紆其上面對青松曦光四徹精舍三間

宸章稱其清潔厯屆

題詠俱摩勒崖壁名山

聖藻千古遭逢

白鶴泉在泰山南麓宋升元觀故址相傳有白鶴  
啄土得泉因而名之泉出石罅水聲錚然精瑩澄  
潔為泰山勝地撫臣於其上恭建

行宮萬壑千巖延入窗牖宛如圖畫乾隆辛卯歲恭  
逢

鑾輅初臨

賜體元堂匾額仰見

聖天子育物宣仁之至意云庚子

御書額曰延綠曰積芳聯曰景清神謐天常泰水趣山  
情靜可論又聯曰築館怡疎泉澄源課治省方近  
瞻嶽育物宣仁又聯曰句披月脇天心妙窗納千  
岩萬壑風又聯曰圖畫奇叅窗戶裏筑琴響通榻  
牀邊又聯曰階下泉聲荅松籟雲間樹色隱峰螺  
又聯曰幾層峰色背檐挹一片波光面座迎又聯  
曰云似畫時偏愜照欲吟詩際恰攄思又聯曰化  
工真閱烟霞表道堯非從色象窺甲辰

御書聯曰靜與心謀寧有色香生鼻觀亦非空

岱廟在泰安府治之西雍正七年

敕修極為閎麗西偏有環詠亭歷代題詠甚富東有漢柏

黛色霜皮亭亭矗立乾隆三十五年遵

旨重修丕增式廓

御製碑文

奎章炳耀撫臣復於此恭構

行殿數楹



皇上省方秩祀胥於是乎憩適焉

對松山在岱嶽南麓由朝陽洞而上巉巖礧礧兩  
山對峙奇松萬樹從峭壁中翳翳而出鱗鬣之而  
蒼然雲表蓋靈泉秀石之所鍾也乾隆丙申歲大  
吏葺治數椽以備

臨幸烟巒霧葉矯若游龍相間於

雲旗翠罕之間有符

睿賞

四賢祠在秦安縣西南魏家莊祀宋胡瑗孫復石  
介孔道輔四賢也府境諸名蹟皆依山取勝至是  
則土壤平曠林木鬱蔥登陟之勞於是少憩撫臣  
於祠西恭建

行宮以駐

清蹕乾隆庚子

御書聯曰閒庭不改風還月歌案依然易與詩又聯曰  
閒披芸簡窗前朗靜聽松風戶外敲又聯曰素壁

題詩還自檢明窗披帙雅相親

孔廟在曲阜縣城內即古闕里面洙背泗雙相圍之

東北也雍正七年奉

勅重建規制崇闕較之歷代益加壯麗我

皇上東巡山左旣蒙

特詣闕里

躬親致祭而自二十二年以後

省方江浙

鑿輅往還復

謁廟瞻拜尊崇之典蓋自古所未有也

孔林在曲阜縣城北泗水上繞以周垣圍徑數里康

熙二十三年

聖祖仁皇帝詣

聖林

詔於原額地外增擴地十一頃十四畝有奇除免糧課雍

正八年奉

詔重修

聖林門堂殿亭益加宏麗是時慶雲疊見瑞應丕昭  
我

皇上繩

武時巡

親詣致奠尊師重道

隆禮有加度越前古矣

中水在泗水縣城北八里蓋居汶南泗北之中地

隣曲阜近聖之居柳塹花村風景殊別乾隆辛卯  
歲恭建

行館

御題齋名曰致本復賦

宸章以志之仰見

聖心厯念民依無時或釋云庚子

御書額曰風醒曰露香聯曰書圃禮園無斃好甌香研  
靜有餘欣又聯曰觸目無非遠塵俗會心皆可入

研覃又聯曰萬頃絳雲秋麥蔚千邨紅雨杏花深  
又聯曰展圖恰對景清候得句多於神謚餘又聯  
曰詩情詎花柳樂意在農桑又聯曰花如濯錦芳  
迎埒草盡貫珠潤疊茵又聯曰虛窗納遠聊披景  
沃壤融膏見種田又聯曰風前畫意輝橫埭雨後  
雲容翳遠巒甲辰

御書聯曰不生波處心恒定大寂先天相總融

古泮池在曲阜縣東南隅其地舊有泮宮臺按水

經注靈光殿東南即泮宮也臺高八十尺臺南水  
東西一百步南北六十步臺西水南北四百步東  
西六十步臺池咸甃石為之即魯頌所謂思樂泮  
水是已乾隆乙亥歲撫臣恭建

行宮屢邀

臨幸壬午復蒙

御製古泮池證疑一篇藻芹風雅萬禩不磨矣

孟廟在鄒縣城南右臨大道北去孟子故宅三十



餘里宋宣和間移建於此規模宏敞鄒嶧山在其  
東南蔚然深秀於遠眺為宜

皇上南巡迴鑒道經鄒縣並蒙

親詣拈香洵稱尊儒

鉅典乾隆丁丑

御題額曰道闡尼山聯曰尊王言必稱堯舜憂世心同  
切禹顏

泉林在泗水縣東五十里水經注陪尾山之陽四

泉並發故謂之泗今泗源左右有泉數十互相灌輸合而成流故又名泉林康熙二十三年

聖祖仁皇帝駐蹕於此

御製記文勒之碑石醜臣於

御碑亭後恭建

行宮我

皇上幾餘流覽錫以嘉名曰近聖居曰在川處曰鏡瀾  
榭曰橫雲館曰九曲約曰柳烟坡曰古蔭堂曰紅

雨亭號為八景各賦

宸章繩

武紹

歲後先輝映山川靈淑亦胥悅遭際之隆矣乾隆庚子

御書聯曰情性由來耽淡泊文章豈必藉淪漣

註經臺在費縣北六十里臺前有漢鄭康成祠相  
傳為康成註經處石室尚存西北有蒙山七十二  
峰秀插雲表即孔子所登東山也乾隆庚子歲撫

臣於祠之西恭建

行館以備

宸憩甲辰

御書聯曰四壁圖書鑑今古一庭花木驗農桑又聯曰  
觸目無非遠塵俗會心皆可入研覃又聯曰清風  
明月取無盡山峙川流用不窮

萬松山在費縣東北十里齊乘云蒙山前陽口山  
有玉皇觀老子故宮也費縣志陽口山近枋城山

之北浚水出焉今萬松山即其地也蔚然聳峙蒼  
柏成林枯浚兩河夾繞南北乾隆乙酉歲撫臣恭  
構

行殿敬備

駐蹕庚子

御書聯曰拂招林牖風光美負帶烟霞景物清又聯曰  
階臨淥水祛塵遠簷拂蒼松引籟長又聯曰藉松  
為幄陰偏秀倚石成章興迴殊甲辰

御書聯曰滿窗松石無非古一屋雲烟總是清又聯曰  
春隴詩成滿幽野雲巖畫意妙房山

問官里在郟城縣西北境八十里故郟子國孔子  
嘗從郟子問官後人因名此地為問官里列墅縈  
紆長林蔥蒨每當春風遲日桃李爭妍望如錯繡  
乾隆庚子歲恭建

行宮嗣是

時巡駐輦

睿藻頻頒紅蘅綠楊皆蒙

宸賞矣甲辰

御書聯曰饒看花色鮮而潤真覺韶光媚以明又聯曰  
竹秀石奇叅道妙水流雲在示真常又聯曰滿窗  
松石無非古一屋雲烟總是清

郊子花園在郊城縣外里許其地林木蒼蔚土人  
稱為郊子花園乾隆壬午歲前撫臣恭建

行宮規模儉樸無臺沼觀遊之勝恭遇

翠華屢幸

錫以宸章自此永為勝地矣壬午

御書聯曰山容積水融和並物象熙春詠蕩披又聯曰

川原春望全宜畫松柏古心靜可論庚子

御書聯曰問風畧先農桑候覽古欣過禮樂邦

南池在濟寧州南門外唐杜甫有同任城許主簿

遊南池詩後人因祀甫於其地濬池築館遂成勝

境



皇上御題額曰蓋臣詩史

鑾輅經由並

杼鴻藻光猷萬丈遠邁前賢矣

太白樓在濟寧州南城上古任城地也唐李白客  
遊任城縣令賀知章觴白於此後人因建樓焉形  
勢雄傑俯臨運河南北帆檣往來如織

鑾輅疊經臨幸

錫以

天章賀李風流益傳諸不朽矣

分水口在汶上縣界明尚書宋禮用老人白英策  
遏汶水於此濟運地勢高仰南北分流舊有大禹  
廟龍王廟宋公祠乾隆乙酉歲前撫臣恭構數楹  
以備

御舫至此登覽分水形勢

御書

禹王廟額曰溯源明德聯曰敷土奠山川行所無事

分流導南北因其自然又

御書

闕帝廟額曰赫濯同欽聯曰本正大之情放海而準  
體神明之德如川斯流

光岳樓在東昌府城中傑構入雲高下在目或曰  
可以遠望岱岳故名或曰意取接三光而齊五岳  
也其興建始末無可考據

皇上春巡山左六巡江浙屢經登臨其上

親揮宸翰

睿藻

輝煌斯樓之名自此永傳萬古乾隆乙酉

御書額曰光岳樓

無為觀在臨清州境運河南岸舊有玉皇閣

聖祖仁皇帝

賜額曰無為觀乾隆乙酉歲撫臣添建數楹恭備

宸遊臨憩

御書額曰福佑津途聯曰雙牕節宣資利濟三元調燮

協寧居


四女寺在恩縣界運河滾水壩側運河水勢全在蓄洩得宜恩縣之四女寺與德州之哨馬營並為運河減水分入老黃河要道仰蒙

睿慮精詳

特命大臣悉心籌辦乾隆乙酉歲

皇上南巡由水路

迴鑾順道閱視撫臣於河干恭設數楹以備  
宸憩



欽定南巡盛典卷八十三

欽定四庫全書

史部

欽定南巡盛典卷八十四

詳校官通政司經歷臣郭祚熾

欽定四庫全書

欽定南巡盛典卷八十四

名勝

江南淮安徐州揚州

龍泉莊在宿遷縣為入江南首程距山東接壤之  
紅花埠三十五里

鑾輅時巡向皆

駐蹕行幄乾隆己亥歲督臣奏請添構

便殿數楹欽奉



諭旨勿事浮靡因于舊基西南二里度地營建恭備  
臨幸自此峒崕山色駱馬湖光永煥彩于雲楣松棟間  
矣庚子

御書堂額曰行春聯曰境因徑曲詩情遠山為林稀畫  
幃開甲辰

御書聯曰對時真愜農桑慶寧道非關視聽娛

順河集在宿遷縣運河逆隄之旁過永濟橋五里  
北拱三山南繞六塘乾隆庚辰歲恭建

行館以供憩宿自後

車駕經臨屢奉

清蹕焉壬午

御書額曰澤國敷春聯曰百里控長隄利籌行水三閭  
開樸宇安厯同民又聯曰暇當締几身聊憩景入  
紗疏意與存甲辰

御書聯曰寒勒梅巖紅始吐潤含麥坂綠方蕤

林家莊在桃源縣乾隆己亥歲督臣奏請于旱營

舊基酌添

行殿敬體

聖心諸從樸斷弗施丹艸恭逢

義馭經臨

天章錫咏仰見

省方觀民慶行惠施稽之前古無以加云庚子

御書齋額曰展義又額曰風日清美聯曰徧野麥針含

露潤夾衢柳綠冒烟輕又聯曰騁目不遮斯暢矣

棲心惟靜總宜馬甲辰

御書聯曰何處不堪體物理于斯亦未忘民艱

陳家莊在桃源縣

皇上三幸江南俱

駐蹕於魯家莊營盤乾隆二十九年欽奉

諭旨即于舊營酌備座落數字省帶布城一分以節馱  
運之煩大吏欽遵相度以陳家莊地勢較高與舊  
營相去無幾恭建

行館於此庚子

御書堂額曰同和

楊家莊在清河縣先是督臣於桂家莊恭建

行宮近李家莊新運口乾隆四十五年

皇上以漕艘商舶皆願行楊家莊中河舊口因

命移建于此

翠華臨幸得以

閱視堤工猗歟至哉一

蹕途暫憩之所而俯順民情若此

大聖人如天之仁豈誦說所能盡也庚子

御書齋額曰融春

陶莊河神廟在淮安府清河縣自河淮合流清水  
不能刷黃恒有倒漾之患仰蒙

皇上睿斷

訓示周詳於陶莊開濬引河越丁酉春歲功于是河流  
北移清口暢達二瀆又寧

御製碑文紀其事歸功于

天佑

神祠

命于新口石壩建廟安

神并

錫以迎神送神樂章恭逢

翠華臨莅

宗祀升香仰見

至誠歆感於萬斯年安瀾永慶詩所稱懷柔翁河猶未  
足以方斯昭貺也庚子

御書額曰功佑宣流聯曰河勢導而成清黃交賴神庥  
順以助南北胥恬

惠濟祠在淮安府清河縣祠臨大堤中祀

天后明正德二年建嘉靖中賜額曰惠濟其神福河  
濟運孚應若響祠前黃淮合流地當形勝為全河  
之樞要



國朝久邈崇祀我

皇上臨幸升香薦帛禮有加隆焉乾隆辛未

御書祠額曰福佑河漕曰協順資靈曰道光玉宇聯曰  
璿源順效安瀾慶玉粒長資飛輓功又聯曰靈昭  
雲馬風樯會績奏河清海晏時又聯曰神契元符  
傳玉簡妙叅紫炁闕金庭又

御書惠濟祠行殿額曰繼述平成曰風帆沙嶼聯曰極  
目雲濤思利濟關心沮洳切疇咨又聯曰上策評

量懷賈讓一時詞賦憶枚舉丁丑

御書額曰惠濟壬午

御書聯曰韶光喜不藏隄樹綠意看將漾汴蘋乙酉

御書聯曰天光水態披襟袖岸芷汀蘭入畫圖又聯曰

湖山入畫迎人翠鳬雁當春得意鳴又聯曰長隄

罨畫青連野新水連漪綠映船

天寧寺在揚州府拱宸門外舊為晉大傅謝安別

墅義熙間梵僧譯華嚴經于此褚叔度請于謝琰

遂捨為寺名謝司空寺宋政和間改今名乾隆丙子歲於寺之右恭建

行宮自後

聖駕南巡俱邀

駐蹕乙酉于寺內

題省方設教四字揭之楣間臣民仰瞻益敬頌

大聖人勤民之至意云辛未

御書寺額曰淮南香界曰浮山華海聯曰花雨南天靈

文傳妙諦香雲蜀阜舊墅表名區丁丑

御書寺額曰淮南麗矚曰神威擁護聯曰閭里謳歌聞  
樂愷軒窓烟景適清嘉又聯曰楚尾吳頭開畫鏡  
林光鳥語入吟軒壬午

御書寺殿聯曰西竺一駐祥輪三摩合證東山留淨業二諦  
俱融又聯曰琉璃瓶水資功德瓔珞龕雲現吉祥  
又聯曰衆香馥郁凝華蓋多寶光明駐法輪又聯  
曰寶地生歡喜香臺普吉祥

御書行宮堂額曰大觀  
睽曰樹將暖旭輕籠牖花與香  
風並入簾又睽曰麗日和風春淡蕩花香鳥語物  
昭蘓又睽曰鈞陶錦繡化工逸松竹笙簧仙籟諧  
又睽曰胸意延山趣春工逸物情乙酉

御書寺樓曰萬佛樓殿曰大雄寶殿又睽曰商鼎周彝  
自典重檻葩苑樹相芬芳庚子

御書行宮額曰東壁流輝又額曰文滙閣  
睽曰成陰高樹天然爽過雨閒花自在香  
又睽曰憲虛含爽籟

座靜接朝嵐甲辰

御書聯曰問景詎寧欣若續甄心益覺勅惟幾

萬壽重寧寺在天寧寺後乾隆癸卯歲醴臣

奏請恭建為淮商祝

釐之所臣民歲時延集僧衆建設經壇恭祝

聖壽以致愛戴之忱寺旁為東園

翠華臨莅多邀

睿藻焉甲辰

御書額曰勅賜萬壽重寧寺又額曰普現莊嚴曰妙香

花雨又

賜寺旁東園堂額曰春熙曰俯鑑室曰琅玕叢聯曰水  
木自清華方壺納景烟雲共澄霽圓鏡涵虛又聯曰  
春色芳菲入圖畫化機活潑悟魚鳶又聯曰倚巖松  
翠龍鱗蔚入幄篁新鳳尾安又聯曰自覺雲林延靜  
賞喜從香界覓新題

柳湖春汎在倚虹園之西湖心壘石為山建亭其上

小橋通之橋之西北亭榭掩映蘆荻參差荷葉田  
田一望無際

冶春詩社在虹橋之西與倚虹園東西相望皆郡  
人上已修禊之所今為冶春樓取王士正詩名之  
又有香影樓懷仙館秋思山房

淨香園在虹橋之東築堂以奉

宸憩堂左則仿秦西營造法為室五重過此層欄繞屋  
曲檻臨波曰荷浦薰風由春波橋折而之北則接



趣園矣乾隆壬午

御書額曰淨香園聯曰結念底須懷爛漫洗心雅足契  
清涼又聯曰竹喧歸浣女蓮動下漁舟乙酉

御書堂額曰怡性聯曰雨過淨倚竹夏前香想蓮甲辰  
御書聯曰水以澄渟謀目靜山惟平遠致心閒

青琅玕館在淨香園之右蓺竹萬竿中置亭館石  
筍林立掩映蔥青春雨抽萌秋風響籜自饒佳趣  
香海慈雲在淨香園之北碧沼數畝澄明如鏡中

為海雲龕奉大士像其南為來薰堂堂之東為春  
波橋

長隄春柳由虹橋而北沿海皆高柳長條踈地如  
行圖畫中橋之東為跨虹樓迤邐而北有濃陰草  
堂曉烟亭曙光樓

趣園舊稱四橋烟雨四橋者南為春波北為長春  
西為玉版又西則曰蓮花春水方生千頃一碧而  
層軒洞豁曲檻逶迤高下掩映每當暝烟羃歷小

雨簾纖環望四橋如綵虹蜿蜒出沒波間極水雲  
縹緲之趣乾隆壬午

御題額曰趣園  
聯曰縈迴水抱中和氣平遠山如蘊藉  
人又聯曰目屬高低石步延曲折廊乙酉

御書聯曰何曾日涉原成趣  
怡神  
御書額曰半畝塘  
聯曰妙理清機都遠俗詩情畫趣總

水雲勝概在趣園之西徧有勝概樓吹香草堂春

水廊小南屏其右則蓮花橋也

梅嶺春深即長春嶺也嶺上多植梅花故名兩水合流縈繞山麓虛亭曲檻點綴有致

桃花塢在保障河西岸西通法海橋春日繁花齊放望如錯繡有蒸霞堂澄鮮閣山半有高樓可以遠眺

蓮性寺舊名法海寺四面環水白塔峙其中又有夕陽雙寺樓雲山閣諸勝橋則法海跨其前蓮花

踞其後迤北青帘白舫每縈拂于春秋佳日也乾

隆丁丑

御書額曰衆香清梵

白塔晴雲與蓮性寺白塔隔水相對故名有花南  
水北之堂積翠軒林香草堂諸勝

望春樓與白塔晴雲相連琢石為池左右二橋彎  
環如月其對岸即熙春臺也

香阜寺在揚州江都縣運河之東土脈隆起如山

俗名小五臺岡阜陂陀松篁蒼翠與金碧名藍掩  
映高下山靈亦若有知敷榮聳秀欣然而望

辛馬乾隆丁丑

御書額曰臺麓化城聯曰紺宇晴空翠嵐浮蜀阜祇林  
香靄禪月湛邠流

竹西芳徑在揚州城北十里唐杜牧詩誰知竹西  
路歌吹是揚州名由此而著有上方寺寺舊藏石  
刻寶誌像唐吳道子畫李白贊顏真卿書亦稱三

絕又壁有石刻為宋蘇軾送李孝博詩寺旁為竹  
西亭乾隆甲辰

御書額曰竹西精舍聯曰慧草階前亦生意德山戶外  
自佳隣

平岡艷雪在草河南植紅梅數百本中構亭館早  
春花放不減嶠山之雪也近水則護以長隄垂柳  
疎筠引人入勝

臨水紅霞在平岡艷雪之左其地多桃花每春深

花放爛如錦綺中為桃花庵清磬疎鐘聲出林表  
亦棲禪之勝地也

杏花村舍在草河北岸東連迎恩橋竹籬茅舍頗  
具野趣

邳上農桑在迎恩河西岸敬仿

聖祖仁皇帝耕織圖於河北藝嘉穀樹條桑井陌蠶房恍如  
圖繪

皇上教養之恩



聖代恬熙之象舉此可見以視幽風七月殆有加焉

慧因寺向為舍利禪院恭逢

車駕臨幸

賜今名旁有小園叢桂古松境絕清迥中有悟香亭寺  
鐘初動梵唱同聲時得靜中之趣西為曲廊水榭  
低貼水際北折為廳顏曰綠楊城郭右為芍園多  
異種小築數椽亦饒秀野靜閒之勝乾隆辛未

御題額曰慧因寺丁丑

御書額曰慈緣勝果

卷石洞天在城河北岸疊石為山玲瓏窈窕巖壑天然其旁為宛委山房契秋閣

堞雲春暖在北門外城隅臨水為園屋宇參差竹樹蓊鬱大有濠濮間想

倚虹園本元崔伯亨園址為虹橋修禊之所傍城西濠三面臨河有領芳軒餞春館諸勝乾隆壬午御書園額曰倚虹曄曰柳拖弱縷學垂手梅展芳姿初

試頻又睽曰明月松間照清泉石上流乙酉

御書樓額曰致佳睽曰花木正佳二月景人家疑近武

陵漢甲辰

御書亭額曰潤竹睽曰鈞陶錦繡化工暢松竹笙簧仙  
籟諧

西園曲水在城河西北水自北而東折若半壁然  
依水曲折以置亭館有新月樓觴詠樓拂柳亭

春臺祝

壽在保障河西岸為兩淮人士獻

壽呼嵩之所其左為曲樓數十楹與篠園相屬

篠園花瑞在熙春臺左園廣數十畝徧栽芍藥其  
種有並頭三萼者尤為罕覩因作瑞芍亭以紀盛  
云

平流湧瀑在熙春臺右有竹亭水由亭下過石橋  
入保障河又有鏡泉樓含珠堂亦于登眺為宜

水竹居

皇上臨幸賜名也山石壁立屈曲若展畫屏中有花潭  
竹嶼又玉蘭數十本環繞精舍花時清輝照人如  
在瑤林瓊樹間循廊而西巨石臨水上鐫石壁流  
淙四字水由石罅落池中懸流漚漚冬夏不竭其  
間為堂為樓為亭為花塢曲折交互最後萬竿淨  
綠一鏡拖藍水竹幽奇于斯為最乾隆乙酉

御書額曰水竹居又書軒額曰靜照曄曰水色清依榻  
竹聲涼入牕

高詠樓在蜀岡朝旭之左舊傳宋蘇軾題西江月  
詞于此乾隆壬午

御書額曰高詠樓聯曰山堂返棹閒留總畫閣開牕納  
景光甲辰

御書堂額曰清韻聯曰水月清懷同迴照神仙翰墨有  
餘芬

蜀岡朝旭在高詠樓之右其地近連蜀岡初日照  
萬松間如浮金疊翠所謂西山朝來致有爽氣者

也有來春堂曠如亭初日軒皆登眺之所

春流畫舫在蜀岡朝旭之北臨水為屋四壁垂簾  
波紋蕩漾

錦泉花嶼在保障河東岸南接水竹居北連功德  
山入門而左為錦雲軒牡丹開時爛若疊錦西有  
微波館泉出澗中泠泠不竭

功德山山有觀音寺亦名觀音山在蜀岡最高處  
天花佛火僧戒梵音儼在靈鷲峯頭也上有小池

畜文魚數百頭臨池為屋以遊

睿覽乾隆乙酉

御書額曰天池聯曰涿水入澄照青山猶古姿

山亭野眺在功德山之半前為南樓可以眺遠山  
後臨池為屋顏曰芙荷深處

平山堂在法淨寺之右宋郡守歐陽修建以南徐  
諸山環拱望與檻平故名其時梅堯臣王安石蘇  
軾秦觀諸人皆有唱和之什堂之前為行春臺初



建於宋守刁約堂之西曰第五泉復顯於明僧滄  
溟其餘樓閣池臺頗饒勝賞恭蒙

列聖留題

天文為奕

皇上復疊頒

奎藻寵錫逾常賢守名山河幸七百餘年以後邈此  
殊榮乾隆丁丑

御書聯曰詩意豈因今古異山光長在有無中甲辰

御書額曰天然三友又聯曰對時真愜農桑慶寧道非  
關視聽娛

法淨寺古棲靈寺又稱大明寺寺枕蜀岡舊有浮  
圖九級見于大觀圖經唐劉長卿高適諸人俱有  
詩乾隆乙酉

車駕重幸

賜名法淨寺

御書聯曰竹裏尋幽徑梅間卜野居

萬松疊翠園與蜀岡相對萬松森立滴露飄花近  
落衣袖

小香雪在蜀岡平行處東接萬松亭由法淨寺東  
棲石磴而下北過小橋穿竹徑復折而東數十步  
古梅繞屋疎影寒花洵為清涼香界乾隆乙酉

御書額曰小香雪

康山在揚州府新城西南隅明正德中武功康修  
撰海寓居于此山構草堂于上其東為觀山臺遙

望郭外風帆來往隔江山色青翠如畫乾隆庚子  
御書額曰康山草堂聯曰時花二月之中遇古樹千年

以上論甲辰

御書樓額曰對山聯曰龍庭水樹宜涼影匝砌烟花帶

露姿

九峯園園故多佳石大者逾丈小亦及尋如仰如  
俯如拱如揖如鰲背如駝峯如蛟舞螭盤如獅蹲  
象踏千形萬態不可端倪石間羅植卉木又築臨

池小榭以擬右軍墨池南為風漪閣可供眺望  
乾隆壬午

御書額曰九峯園  
聯曰雨後蘭芽猶帶潤  
風前梅朶始  
教榮又聯曰名園依綠水  
野竹上青霄  
乙酉

御書聯曰縱目軒窗饒野趣  
遣懷梅柳入詩情  
甲辰

御書額曰澄空宇  
聯曰紅梅翠竹天然繪  
妙理清機不  
畫吟

高旻寺在城南十五里之茱萸灣其水北承淮流

西達儀徵南通瓜步故亦名三汊河寺踞其上有  
塔曰天中琳宇嵯峨遠臨俯瞰洵江皋攬勝之地  
聖祖仁皇帝南巡于此敬建

行宮

皇上省方重葺其舊以備

臨幸乾隆辛未

御書寺額曰江月漱觀睽曰潮湧廣陵磬聲飛遠梵樹

連邦水鈴語出中天

御書殿額曰邗江勝地曰江表春暉  
聯曰衆水迴環蜀岡秀大江遙應廣陵濤  
又聯曰碧漢雲間晴階分塔影青郊雨足春陌起田歌  
丁丑

御書行宮佛堂聯曰法雲迴蔭蓮華塔慈照長輝  
貝葉經又聯曰塔鈴便是廣長舌香篆還成妙鬘雲  
又寺旁

關帝廟額曰氣塞宇宙壬午

御書齋額曰卷畫牕乙酉

御書聯曰綠野農懽在青山畫意堆庚子

御書堂額曰得閒聯曰清風明月取無盡山峙水流用

不窮甲辰

御書堂額曰承煦聯曰宇宙以來此山色冲融之際蕩

烟光

錦春園在揚州府城南三十里距由開關二里舊  
有大觀樓後成小築門臨水次丹堊相鮮其中傑  
閣修廊松泉蘿磴頗足幽勝四圍羅植花木每遇



風日晴美爛若舒錦乾隆辛未

御書額曰錦春園丁丑

御書額曰竹淨松澁甲辰

御書聯曰鏡水雲岑標道趣輕蕙嫩蘼續春光又聯曰  
鏡裡林花舒艷裔雲邊樓閣隱神仙

欽定南巡盛典卷八十四